

Lantschà l'iniziativa «mitschar ord la via tschocca»

Ier han ins preschentà las raschuns per la nova iniziativa

CLAUDIA CADRUVI / ANR

■ **Sch'i na reussescha betg da contingentar l'immigraziun sin ina moda che sa cumporta cun las cunvegns bilaterals, vul ins avair in plan B. L'iniziativa «mitschar ord la via tschocca» duai porscher in'alternativa, sco ils iniziants han explitgà ier a Berna.** Il text d'iniziativa è uschè curt sco anc mai: «Aboli». Ils votants svizzers duain anc ina giada pudair decider davart l'artitgel 121a. Ils 9 da favrer cura ch'il suveran ha acceptà quest artitgel cun dir «gea» a l'iniziativa da la pps, steva «l'immigraziun da massa» en il center. Quella dueva vegnir cumbattida cun contingents. L'iniziativa «mitschar ord la via tschocca» metta il focus sin las cunvegns bilaterals e la relaziun cun l'UE.

Avunda tgirunzas e medis

Ier a la conferenza da medias èn s'annunziads oravant tut gliedud giuvna a pled: medis, perscrutaders, interpretaders etc. Els han avertì d'ina isolaziun da la Svizra en l'Europa. «Durant mes studi da medischna hai jau sentì mez, tge che contingents muntan. I dat quotas per il dumber da medis che vegnan scolads mintg'on», ha ditg il medi e perscrutader *Reto Auer*. Gist pervi da questa contingentaziun na dettia quai oz betg avunda medis en Svizra.

Cun ina contingentaziun d'immigraziun dependia il sistem da sanadad en l'avegnir da la bunaveglia da la politica. «D'avair avunda tgirunzas na dastga betg depender da la politica», ha ditg Auer.

«Tissi per noss'economia»

Bleras sfidas possian ins be prender a

maun cun ina collavuraziun sur ils cunfins ora, ha ditg *Franziska Barmettler* da swisscleantech. La vieuta d'energia ed il cumbat cunter la midada da clima sajan exempels per talas sfidas.

Per ina gronda part da las interpresas pitschnas e mesaunas saja quai indispensabel da pudair exportar products en l'Europa senza ch'ins stoppia tschentiar dumondas per permissiuns spezialas per mintga pajais. «Gliez na fiss strusch da dumagnar e finanziaimain betg supportabel.»

55 pertschient dals exports svizzers gjajan en l'UE e 75 pertschient dals imports derivian da là, ha ditg Barmettler. Sch'ins realiseschia la contingentaziun da l'artitgel 121a mainia quai en ina via tschocca e portia malsegirezzas durant plirs onns. «Quai è tissi per noss'economia.»



L'iniziant Leo Caprez di ch'ins stoppia reponderar ils contingents - per betg ristgar ina disgrazia cun las bilaterals.

KEYSTONE

Leo Caprez: «Sch'i fa trid'aura èsi da turnar»

Cun il maletg d'ina tura en las muntognas illustrescha l'interpretader *Leo Caprez*, pertge ch'i dovra l'iniziativa. Suandanta istorgia ha el raquintà ier a la conferenza da medias a Berna (versium ferm scursanida):

«I po dar che nus partin la damaun a bun'ura da la chamona ed avain ina bellezza vista sin il piz. Tuttenina sa mida l'aura ed i sa mussa ch'igl è memia ristgà da cuntinuar la tura. Nossa gruppa turna enavos. La tura da muntognas helvetica ha cumenzà ils 9 da favrer cura

che nus votants svizzers avain acceptà l'iniziativa da contingentaziun. Dapi lura hai dà bleras propostas co metter enturn ils contingents. Da preschent na datti nagina proposta per ina via empermettenta. L'UE ha pliras giadas fatg cler che las cunvegns bilaterals na sa cumportian betg cun contingents e disposiziuns discriminantas. Igl è da temair che l'UE restia dira e statueschia in exempel cun la Svizra per demonstrar fermezza cun defender la libra circulaziun da persunas. Sch'i avess pia dad esser inevitabel

che las bilaterals vegnan visadas, lessan nus dispit pussibilitar als votants dad examinar anc ina giada la decisiun dals 9 da favrer 2014. Reusseschi dentant a la politica instituziunala da vegnir cun propostas valablas, beneventassan nus sa chapescha quai. Lura retirain nus l'iniziativa. En gliez senn è nossa iniziativa in plan B. Uschia lain nus proteger la Svizra d'ina disgrazia cun simplamain marschar vinavant sin ina ruta malsegira. Per survivor ston muntagnards mintgatant ponderar da turnar.»